



Sentrum vir
**GRONDWETLIKE
REGTE**

SGR VERWELKOM VERGADERING TUSSEN HOOFREGTER EN DIE PRESIDENT

Adv Johan Kruger, Direkteur: Sentrum vir Grondwetlike Regte

Die Sentrum vir Grondwetlike Regte (die SGR) verwelkom die vergadering wat onlangs tussen die Hoofregter as hoof van die regbank, en die President as hoof van die Staat plaasgevind het. Die vergadering, wat deur die Hoofregter, Hoofde van die Hofe en senior regters in alle afdelings aangevra is, het ten doel gehad om die ongevraagde aanvalle deur sommige politici op die Regbank, asook die regering se klaarblyklike minagting van hofbevele aan te spreek.

Die Regbank het 'n grondwetlike plig om die Grondwet te onderhou, om die wet kragtens die Grondwet uit te lê en enige wet of optrede wat nie aan die Grondwet of die reg voldoen nie, ongeldig te verklaar. Gevolglik en desnieteenstaande die leerstelling van die skeiding van magte, is die Regbank die finale gesag ten opsigte van die uitleg van die Grondwet en die reg. Geen persoon of staatsorgaan mag inmeng met die funksionering van die Hofe nie, en alle staatsorgane, by wyse van wetgewende en ander maatreëls, die Hofe bystaan en beskerm ten einde die onafhanklikheid, onpartydigheid, waardigheid, toeganklikheid en doeltreffendheid van die Hofe te verseker. Daarbenewens bind 'n besluit deur die Hof alle persone en staatsorgane op wie dit van toepassing is.

Die vergadering was duidelik 'n geleentheid vir die Hoofregter om die idee van regterlike gesag en die Oppergesag van die Reg, wat in die Grondwet verskans is, weer te bevestig. Die feit dat dit nodig was vir die Hoofregter om sy boodskap aan die President en die Uitvoerende Gesag oor te dra, is egter om verstaanbare redes kommerwekkend.